



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 31.10.2025. godine

VIJEĆNIČKA PITANJA
POSTAVLJENA NA 11. REDOVNOJ SJEDNICI OPĆINSKOG VIJEĆA VOGOŠĆA
održanoj 30.10.2025. godine

Na 11. redovnoj sjednici Općinskog vijeća vijećnik **Cvrk Čamil (u ime Kluba vijećnika DF)** postavio je slijedeće vijećničko pitanje:

11/1. Zašto građani više nemaju mogućnost plaćanja računa za vodu u Komunalnom centru Vogošća, kao što je to ranije bilo omogućeno. Molim nadležnu općinsku službu da utvrdi razloge obustave ove usluge i da ukoliko je moguće, u saradnji s preduzećem KJKP „Vodovod i kanalizacija“, razmotri mogućnost ponovnog uspostavljanja naplate na ovoj lokaciji radi olakšanja građanima.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

11/2. Koliko je iz Budžeta Općine Vogošća uloženo u sport tokom posljednje tri godine, razvrstano na kapitalna ulaganja i tekuće grantove, te koliki je procenat tih ulaganja u odnosu na ukupno izvršenje Budžeta. Također, molim da mi se dostavi spisak svih sportskih organizacija koje u trenažnom procesu koriste kapacitete JU „Kulturno-sportski centar“ Vogošća, uz informaciju da li plaćaju zakup termina i u kojim iznosima.

11/3. Postavljam pitanje nadležnom Ministarstvu za boračka pitanja Kantona Sarajevo i JU Fond Memorijala Kantona Sarajevo koje se odnosi konkretno na nekadašnji logor "Kon-Tiki" u Vogošći, čija je krajnja namjena uspostavljanje "Muzeja stradanja građana Bosne i Hercegovine". Obzirom da je izvršena primopredaja otkupljenog objekta nekadašnjeg logora koji je podsjetnik na događaje iz perioda 1992 - 1995. godine i trajno svjedoči o golgoti kroz koju su prošli prisilno zarobljeni građani i građanke Vogošće, Sarajeva, Nahoreva, Sokoca, Ilijaša i Visokog, kao i torturama koje su preživjeli na tom mjestu, te u logoru Bunker koji se nalazio pored objekta. Pitam:

1. Zbog čega su radovi na projektu „Kon-Tiki“ u Vogošći obustavljeni i kada se očekuje njihovo ponovno pokretanje.
2. Koje konkretne mjere zaštite su poduzete na gradilištu, kako bi se spriječila šteta usljed mraza, kiše i drugih vremenskih uticaja.
3. Da li su pribavljene sve potrebne saglasnosti za izvođenje radova predviđenih projektom.
4. Kada se konkretno planira nastavak radova i da li je realno očekivati da će ona biti okončana u 2026. godini, ukoliko nije, kako je planirano.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

11/4. U ime građana Vogošće postavljam pitanje direktoru RTV Vogošća, da li postoji mogućnost da se jedna kamera postavi u ulicu Jošanička, koja bi uživo prenosila zbivanja u ovoj ulici, a u podlozi da se emituje radio Vogošća. Građani smatraju da bi se ovim načinom osvježavanja programa RTV Vogošća povećala gledanost RTV Vogošća i dala nova dimenzija u prenosu objektivnosti u našoj općini.

11/5. U ime građana Vogošće postavljam pitanje u čijoj je nadležnosti propadanje zgrade Crvenog križa u Jošaničkom potoku. Zgrada Crvenog krža u Jošaničkom potoku je jedna od ljepših građevina na području općine Vogošća i lokacijom gdje je smještena predstavlja kompletan ambijent arhitektonskog ugođaja u prirodi. Pored zgrade se nalazi zapušteno fudbalsko

igralište i jedan koš za basket takmičenje. Zašto se ova zgrada ne dozvoli na korištenje našim penzionerima, mladim sportistima, udruženjima građana. Zašto trebaju neki stranci da nam ukazuju na ljepote i okruženja u kojima živimo.

Vijećnik Efendić Emir (u ime Kluba vijećnika S BiH) postavio je slijedeća vijećnička pitanja:

11/6. Obraćam se nadležnoj općinskoj službi s ciljem dobivanja informacije o planiranoj sanaciji asfaltne podloge na raskrsnici ulica Braće Kršo i Akifa ef. Biserovića. Na navedenoj lokaciji već duži vremenski period postoji izrezana asfaltna površina, nastala usljed izvođenja radova na vodovodnoj mreži. Zbog toga su vozači primorani obilaziti nastalu rupu, što dodatno otežava saobraćaj i povećava rizik od oštećenja vozila. Dodatno zabrinjava činjenica da predmetna oštećenja nisu adekvatno obilježena, čime se ugrožava sigurnost učesnika u saobraćaju i povećava rizik za saobraćajne nezgode. Molimo da nas obavijestite kada je planirana sanacija predmetne asfaltne površine, kako bi se omogućilo nesmetano i sigurno odvijanje saobraćaja na navedenoj raskrsnici.

11/7. Postavljam pitanje prema nadležnoj PU Vogošća za kontrolu buke koju proizvodi rad motocikla (skuter) u noćnim satima. U posljednje vrijeme primjetno je da u noćnim satima u užem dijelu Vogošće, se vožnjom najvjerovatnije motocikla (skuter) proizvodi veća buka motora i time remeti javni red i mir. Naime, navedeni motocikl (skuter) primijećen je više puta u užem dijelu naselja Vogošća, koji proizvodi veoma jaku buku motora naročito u noćnim satima, što uznemirava mir građana. Na skuteru je vrlo vjerovatno uklonjen fabrički prigušivač emitovanja zvuka na sistemu izduvnih gasova ili je postavljen neki uređaj za pojačavanje buke rada motora. Stoga pitanje za Policijsku upravu, da li su policijski službenici primijetili navedenu pojavu i ako nisu bilo bi potrebno obratiti pažnju na isto, pronaći vozača navedenog motocikla (skutera), sankcionisati ili poslati na vanredni tehnički pregled,

Vijećnica Salčin Sabiha (u ime Kluba vijećnika SDA) postavila je slijedeće vijećničko pitanje:

11/8. Na 3. redovnoj sjednici Općinskog vijeća podnijela sam inicijativu za uvođenje redovne minibus linije na relaciji Krivoglavci II – Pravoslavno groblje – Krivoglavci I – Svrake, s ciljem olakšavanja svakodnevnog kretanja stanovnika ovih naselja, posebno studenata, radnika i penzionera. S obzirom na činjenicu da stanovnici svakodnevno pješače više od dva kilometra do najbližeg autobusnog stajališta, te da se broj stanovnika u ovim naseljima konstantno povećava, molim nadležno Ministarstvo da dostavi informaciju o trenutnom statusu realizacije ove inicijative. Da li je izvršena analiza opravdanosti zahtjeva, te da li je planirano uvođenje minibus linije u narednom periodu.

Vijećnik Gljiva Avdo (u ime Kluba vijećnika DF) postavio je slijedeće vijećničko pitanje:

11/9. Pitamo nadležnu inspekcijску službu kada će izvršiti inspekcijски nadzor u Donjoj Jošanici, gdje je firma koja je izvodila radove na polaganju kablova za električnu energiju nakon završetka radova nije vratila saobraćajno ogledalo niti putni znak s nazivom ulice koji vodi do broja 97. Molim da se utvrdi ko je izvođač radova, te da se istom naloži vraćanje uklonjenih elemenata (ogledala i znaka) kako bi se osigurala preglednost i bezbjednost kretanje vozila, kao i orijentacija stanovnika i dostavnih službi.

Vijećnik Škoro Hamdija (u ime Kluba vijećnika Naprijed BiH) postavio je slijedeće vijećničko pitanje:

11/10. Kako i na koji način se javna parking mjesta u vlasništvu Općine Vogošća mogu dati u zakup pravnim ili fizičkim licima. Po kojim kriterijima i zakonskim osnovama ili nekim drugim se daju ista, obzirom da imam informaciju da neki mogu koristiti, a neki ne. Pored toga, dobio sam informaciju da su i njihovi zahtjevi da se postavi znak X zabrane parkiranja, da bi se nesmetano moglo ući u njihove objekte u kojima obavljaju svoje djelatnosti koje građani koriste odbijeni. Primjer toga je u ulici Jošanička pored Poliklinike „Sanasa“, koja posjeduje parking prostor, a privrednim subjektima koji se također nalaze tu nije dozvoljeno. Molim da mi se odmah odgovori kako jedni mogu i već godinama koriste parking prostor, a drugi ne mogu i njihovi zahtjevi se odbijaju.

Vijećnik **Gljiva Eno (u ime Kluba vijećnika DF)** postavio je slijedeće vijećničko pitanje:

- 11/11.** Molim nadležnu službu da dostavi informaciju da li se ulica Mitra Šućura (od broja 115. do 199.) nalazi u Programu prioriteta asfaltiranja za tekuću godinu, te da li postoji mogućnost uvrštavanja ove dionice u plan prioriternih projekata za narednu godinu. Mještani predmetnog dijela ulice su realizovali otkup zemljišta i prenijeli vlasništvo na Općinu Vogošća, čime su, prema važećim kriterijima, ispunjeni osnovni uslovi za izvođenje radova na asfaltiranju.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

- 11/12.** Pitam nadležnu općinsku službu u kojoj je fazi izrada projektne dokumentacije za izgradnju pasarele za prelaz pješaka preko magistralnog puta u naselju Hotonj, te okvirni vremenski rok realizacije projektne dokumentacije?

- 11/13.** Ko je nadležan za izgradnju i održavanje pasarele za prelaz pješaka preko magistralnog puta u naselju Hotonj nakon što općinska služba izradi projektnu dokumentaciju. Da li je to Općina Vogošća, Direkcija za puteve Kantona Sarajevo, JP Ceste Federacije BiH ili neka druga institucija.

Obrazloženje:

Nakon niza inicijativa i vijećničkih pitanja u čijoj je nadležnosti bila sada već zatvorena pasarela za prelaz pješaka preko magistralnog puta u naselju Hotonj, stanovnici MZ Hotonj traže konkretan odgovor nadležne općinske službe u čijoj je nadležnosti izgradnja pasarele nakon izrade projektne dokumentacije za istu, jer je potrebno precizno utvrditi nadležnosti za izgradnju i buduće održavanje tog objekta, kako bi se izbjegle administrativne nejasnoće, osigurala izgradnja i stavila što prije u funkciju pasarela.

Vijećnica **Čomaga Almedina (u ime Kluba vijećnika SDA)** postavila je slijedeća vijećnička pitanja:

- 11/14.** Da li je i kada bila pokrenuta aktivnost na formiranju reciklažnog dvorišta na području naše općine.

- 11/15.** Postavljam pitanje nadležnoj općinskoj službi, kakvo je stanje stećaka na području općine Vogošća, da li se radi na očuvanju i prezentaciji istih. Poznato je da na području općine Vogošća postoji nekoliko lokaliteta na kojima su pronađeni stećci. Aktivisti Omladinskog udruženja "Aktiva 2014" iz Vogošće prije nekoliko godina su imali značajan projekat pod nazivom "Restauracija i zaštita kulturno-historijskih spomenika na području općine Vogošća", u okviru kojeg su očistili nekropolu stećaka na području Svraka i Gore i izradili brošuru koja sadrži sve podatke o ovim stećcima i svemu što se uradilo kako bi se zaštitili ovi vrijedni spomenici. Stećci su izuzetno vrijedno kulturno-historijsko naslijeđe i važan trag srednjovjekovne prošlosti ovog kraja. Pored kulturno-historijskog značaja stećci imaju i veliku umjetničku vrijednost, ali i turistički i obrazovni značaj.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

- 11/16.** Da li je pokrenuta procedura javne nabavke za zamjenu table koja označava ulaz u naselje, a za naselje Svrake i kada će ista biti zamijenjena.

- 11/17.** Da li Općina Vogošća planira pokrenuti aktivnosti za zaštitu i uređenje lokaliteta (bunkera i mosta uz bunker u Semizovcu), uključujući čišćenje zarasle vegetacije, sanaciju, kako bi se spriječilo dalje propadanje. Da li je Općina upoznata sa stanjem lokacije i koje procjene postoje o njenom trenutnom stanju.

Vijećnik **Pašić Edin (u ime Kluba vijećnika SDA)** postavio je slijedeća vijećnička pitanja:

- 11/18.** Podijelit ću zabrinutost sa velikim brojem naših sugrađana koja se odnosi na pojavu značajnog broja pasa litalica u posljednje vrijeme na teritoriji naše općine, postavljam pitanje prema nadležnoj službi šta Općina poduzima u okviru svojih nadležnosti po ovoj pojavi.

11/19. Na zahtjev građana naselja Orahov Brijeg a u vezi sa klizištem, ulica broj od 69. do 89. odnosno broj 91., gdje su osim stambenog i poslovnog objekta ugrožene dvije saobraćajnice upućujem pitanje prema nadležnim službama kao i Zavodu za izgradnju Kantona Sarajevo šta je poduzeto od aktivnosti i u kojem je status rješavanje ovog klizišta. Zbog potrebe, zaštite ljudi, njihovih materijalnih dobara, putne infrastrukture, osiguranja životnog okruženja mještane interesuje da li se može očekivati potpuna sanacija ovog klizišta. Mještani su zabrinut prvenstveno zbog očekivane sezone kišnih padavina da može doći do pogoršanja trenutnog stanja.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

11/20. Molim da mi se dostavi informacija u kojoj fazi se trenutno nalazi projekat proširenja ulice Rosulje, na dionici od ulice 24. juna do rezervoara. Konkretno me zanima:

1. Da li je izrađena projektna dokumentacija i ako jeste, kada je planiran početak radova.
2. Ako su radovi već u toku, u kojoj su fazi realizacije i koji je predviđeni rok za završetak.
3. Da li su obezbijedena finansijska sredstva za završetak cijelog projekta.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

11/21. Molim nadležne da se oglase javno i daju tačne informacije, šta se zapravo dešava sa kombi linijom za naselje Tihovići. Zašto su građani pomenutog naselja taoci nečijeg nerada i ne brige. Sramotno je da djeca, stari i bolesni pješače po nekoliko kilometara, jer linije kasne, a nekad uopće ne funkcionišu. Da li će se konačno riješiti ova agonija i maltretiranje građana naselja Tihovići, Blagovac i Rosulje, jer i stanovnici druga dva pomenuta naselja koriste istu liniju. Želim i molim da se javno ogласite i obrazložite.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

11/22. Kada možemo očekivati realizaciju i dostavljanje Općinskom vijeću izvještaj o provedbi Operativnog plana vizije razvoja mjesnih zajednica Općine Vogošća, s obzirom da je plan istekao u junu tekuće godine.

Obrazloženje:

Polazeći od činjenice da je Operativni plan vizije razvoja mjesnih zajednica Općine Vogošća istekao u junu 2025. godine, a da je samom Odlukom o njegovom usvajanju bila predviđena stavka praćenja učinaka i nadzora implementacije plana, kao i dinamika izvještavanja o realizaciji, upućujem sljedeće vijećničko pitanje: Kada možemo očekivati realizaciju i dostavljanje Općinskom vijeću izvještaje o provedbi Operativnog plana vizije razvoja mjesnih zajednica Općine Vogošća, s obzirom da je plan istekao u junu tekuće godine. Zakonske obaveze o izvještavanju o realizaciji razvojnih i operativnih planova jasno su propisane kroz više važećih akata:

1. Zakon o principima lokalne samouprave u Federaciji BiH („Službene novine FBiH“, br. 49/06 i 51/09), član 8., koji propisuje da: „Općina ima pravo i dužnost da donosi razvojne planove i programe, te da osigurava njihovo provođenje i izvještavanje o rezultatima.”
2. Zakon o razvojnom planiranju i upravljanju razvojem u Federaciji BiH („Službene novine FBiH“, br. 32/17), član 21., kojim se utvrđuje obaveza da: „Za svaki planski dokument izrađuje se izvještaj o implementaciji koji sadrži pregled realiziranih mjera i ostvarene rezultate.”
3. Statut Općine Vogošća, koji u dijelu o nadležnostima Općinskog vijeća propisuje da Vijeće: „Usvaja planove i programe razvoja i razmatra izvještaje o njihovom provođenju.”
4. Poslovnik Općinskog vijeća Vogošća, u dijelu koji uređuje nadzornu funkciju vijeća, propisuje da: „Općinsko vijeće razmatra izvještaje o realizaciji odluka, planova i programa koje je usvojilo.”

Imajući u vidu navedene zakonske i statutarne obaveze, te činjenicu da je u Odluci o usvajanju Operativnog plana vizije razvoja mjesnih zajednica eksplicitno navedena obaveza praćenja učinaka, nadzora implementacije i dinamike izvještavanja, tražim informaciju kada će nadležna služba dostaviti izvještaj o realizaciji navedenog plana Općinskom vijeću, kako bi se ocijenila njegova provedba i efekti u proteklom planskom periodu.

11/23. Postavljam pitanje u vezi sa sanacijom ulice kraka ul. Mitra Šućura, na dionici od broja 168. do broja 242.

Obrazloženje:

Naime, prema informacijama građana, planirana je sanacija završnog dijela puta nakon rekonstrukcije vodovodne mreže na toj lokaciji. Mještani su u međuvremenu, riješili imovinsko-pravne odnose sa prethodnim vlasnicima zemljišta i zemljište su ustupili u korist Općine Vogošća, čime je predmetna dionica uvrštena u program prioriteta zbog izraženih potreba i inicijativa građana. S obzirom na veliki broj upita građana, molim nadležnu službu da dostavi detaljnu informaciju o trenutnoj fazi realizacije projekta, te da precizira:

- Da li je završen projektni i tenderski postupak za sanaciju navedene dionice.
- Da li su planirana i osigurana budžetska sredstva za izvođenje radova.
- Kada se može očekivati početak, odnosno završetak radova.

Vijećnik **Gljiva Bego (u ime Kluba vijećnika S BiH)** postavio je slijedeće vijećničko pitanje:

11/24. Na osnovu zahtjeva naših sugrađana vozača teretnih vozila postavljam pitanje prema PU Vogošća koje glasi: da li se može razmotriti mogućnost smanjenja izdavanja prekršajnih naloga vozačima teretnih vozila koji se parkiraju pored puta u zoni kružnog toka na izlazu prema naselju Blagovac. Na navedenoj lokaciji vozači teretnih vozila često privremeno parkiraju pored puta, jer u blizini ne postoji adekvatan prostor za zaustavljanje. S obzirom na to da se radi o profesionalnim vozačima koji tu borave radi istovara ili čekaju istovar ili utovar robe, te da trenutno nemaju alternativnu lokaciju, molim vas da se razmotri mogućnost tolerantnijeg pristupa prilikom izdavanja prekršajnih naloga. Također bi bilo korisno sa nadležnim razmotriti mogućnost da se pronađe privremeno ili trajno rješenje za formiranje parking zone za teretna vozila na tom ili nekom alternativnom području.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 31.10.2025.godine

**INICIJATIVE POKRENUTE
NA 11. REDOVNOJ SJEDNICI OPĆINSKOG VIJEĆA VOGOŠĆA
održanoj 30.10.2025. godine**

Na 11. redovnoj sjednici Općinskog vijeća vijećnik **Cvrk Čamil (u ime Kluba vijećnika DF)** pokrenuo je slijedeću inicijativu:

11/1. Pokrećem inicijativu da se postavi javna rasvjeta u ulici Jošanička, u zoni zgrada s ulazima broj 11. i 13. u neposrednoj blizini objekta Bingo.

Obrazloženje:

Na navedenoj lokaciji ne postoji adekvatna rasvjeta, te su ulazi u potpunom mraku, što predstavlja sigurnosni rizik za stanare i prolaznike, naročito u večernjim satima. Predlaže se da se u okviru redovnog održavanja javne rasvjete ili kroz program komunalnih investicija izvrši postavljanje jedne ili više svjetiljki, čime bi se značajno poboljšala bezbjednost i osjećaj sigurnosti građana na tom području.

Vijećnik **Handžić Jasmin (u ime Kluba vijećnika SDA)** pokrenuo je slijedeće inicijative:

11/2. Pokrećem inicijativu za povećanje cijena zakupa poslovnih prostora u vlasništvu Općine Vogošća.

Obrazloženje:

Cijene zakupa poslovnih prostora u vlasništvu Općine Vogošća nisu mijenjane od 2005. godine, što znači da se već skoro dvije decenije primjenjuju iste tarife, bez obzira na promjene ekonomskih okolnosti, inflaciju i rast tržišnih cijena zakupa u privatnom sektoru. Ovakva praksa dovela je do toga da su zakupnine u općinskim prostorima značajno niže od tržišnih, čime Općina Vogošća ostvaruje manji prihod u Budžetu, a istovremeno se ne postiže pravičan odnos između zakupaca u javnim prostorima i onih u privatnim objektima. Povećanjem cijena zakupa:

- povećali bi se prihodi općinskog Budžeta,
- obezbijedila dodatna sredstva za finansiranje javnih potreba, uključujući sport, kulturu, obrazovanje i podršku privredi,
- uspostavila bi se realnija tržišna vrijednost zakupa u skladu sa aktuelnim ekonomskim uslovima.

11/3. Pokrećem inicijativu za uređenje pitanja koja se odnose na postupanje i problem rješavanja pitanja vezanih za klizišta.

Obrazloženje:

Obzirom da pitanje klizišta po meni nije dovoljno uređeno u smislu identifikacije, vođenja baza klizišta i njihovog ažuriranja, monitoringa, blagovremene procjene opasnosti po stanovništvo i materijalna dobra, kao i nadležnosti u smislu izrade projektnih zadataka i projektnih rješenja za sanaciju, smatram da je potrebno da se ovom pitanju pristupi naučno i stručno kroz donošenje zakona ili definisanih procedura u smislu postupanja i određivanja nadležnosti. Ovdje prije svega mislim na Zakon o prostornom uređenju Kantona Sarajevo ili kroz donošenje podzakosnih akata koji bi ova pitanja uredili i ubrzali rješavanje ovog problema sa kojim se suočava cijeli Kanton Sarajevo.

Vijećnik Pašagić Almir (u ime Kluba vijećnika SDP) pokrenuo je slijedeće inicijative:

- 11/4.** Pokrećem inicijativu za nabavku dvije stomatološke stolice i uređenje medicinskog poda u dvije postojeće ordinacije.

Obrazloženje:

U cilju dostupnosti i sveobuhvatnosti stomatoloških usluga neophodno je unapređenje rada stomatološke službe, tačnije otvaranje ordinacije za ortodonciju (dijagnoza, prevencija, liječenje i korekcija nepravilno postavljenih zuba i čeljusti), te poboljšanje uvjeta rada u ordinaciji protetike (nadomjestak za prirodni zub-izrada proteza). Potrebe građana na teritoriji općina Vogošća i Ilijaš su enormno povećane za ovom vrstom usluge. Ortodoncija je posebno važna za djecu u periodu kada pratimo zdrav rast i razvoj kroz sistematske preglede, a općina Vogošća ima najveći pozitivni prirodni priraštaj (natalitet). JU Dom zdravlja Kantona Sarajevo izrađuje besplatne mobilne aparate, a kroz sistematske preglede konstatovano je da cca. 50% djece ima potrebu za uslugama ortodoncije. Da bi se realizovale navedene zdravstvene usluge neophodno nabaviti dvije stomatološke stolice uz postavljanje medicinskog poda u dvije ordinacije. JU Dom zdravlja Kantona Sarajevo će u narednom periodu raspisati konkurs i osigurati potreban kadar i time će OJ DZ Vogošća prvi put dobiti ordinaciju za ortodonciju.

- 11/5.** Pokrećem inicijativu da se na svim pješačkim prelazima u općini Vogošća postavi svjetlosna signalizacija.

Obrazloženje:

Svjetlosna signalizacija je od velikog značaja za sigurnost pješaka ali i vozača. Vozač će pravovremeno uočiti pješački prelaz i pješake koji prelaze ulicu, a pješak osjeća veću sigurnost znajući da će biti uočen prilikom prelaska ulice. Sigurnost pješaka, posebno djece i starijih građana koji prelaze pješačke prelaze i vozača, treba da bude mjera koja će kroz dobru osvijetljenost da prevenira bilo kakve neželjene događaje.

Vijećnik Efendić Emir (u ime Kluba vijećnika S BiH) pokrenuo je slijedeće inicijative:

- 11/6.** Pokrećem inicijativu prema nadležnoj općinskoj službi za čišćenje i saniranje oštećenja asfaltne podloge u raskrsnici ulica Uglješići – Akifa ef. Biserovića, koja se nalazi u neposrednoj blizini mosta kod Srednjoškolskog centra Vogošća.

Obrazloženje:

Obraćamo se s inicijativom za hitno čišćenje i sanaciju kolovozne površine u raskrsnici ulica Akifa ef. Biserovića - Uglješići, u neposrednoj blizini mosta kod Srednjoškolskog centra. Na navedenoj lokaciji već duži vremenski period prisutan je zemljani nanos koji se akumulirao usljed oborinskih voda, a koji se nalazi na asfaltnoj površini kolovoza. Ovaj nanos uzrokovao je suženje kolovozne trake, što direktno otežava normalno odvijanje saobraćaja, kao i kretanje pješaka. Pored navedenog, na istom dijelu kolovoza došlo je do oštećenja asfaltne podloge, pri čemu su nastala udubljenja (rupe) koje dodatno otežavaju prolazak vozila kroz raskrsnicu, naročito prilikom mimoilaženja. Uzimajući u obzir sigurnosne i funkcionalne aspekte saobraćaja, predlažemo da se u što kraćem roku izvrši uklanjanje zemljanog nanosa s kolovoza i sanacija oštećenja asfaltne površine. Navedene mjere doprinijet će sigurnijem i efikasnijem odvijanju saobraćaja, te poboljšanju uslova za sve učesnike u saobraćaju.

- 11/7.** Pokrećem inicijativu prema nadležnoj općinskoj službi da se izvrši sanacija zemljanog puta koji povezuje ulicu Uglješići i ulicu Porodice Hasagić.

Obrazloženje:

U prethodnom periodu pokrenuo sam inicijativu koje se odnosi na asfaltiranje dionice puta između naselja Donja Jošanica i Uglješići. Nadležna služba je u odgovoru na navedenu inicijativu, obavijestila da je u toku izrada projektne dokumentacije koja obuhvata i rješavanje tog pitanja. Predmetna dionica puta predstavlja najbližu komunikaciju za stanovnike lijeve obale rijeke Vogošće između navedenih naselja. Trenutno stanje puta je izuzetno loše, do te mjere, da je otežan i gotovo onemogućen prolazak vozilima, što direktno utiče na svakodnevni život građana, dostupnost javnih usluga i sigurnost saobraćaja. S obzirom na navedeno, pokrećem inicijativu za hitnu sanaciju predmetne dionice puta, kako bi se omogućila nesmetana saobraćajna komunikacija i unaprijedili uslovi kretanja za stanovnike ovog područja. Smatramo da bi se sanacijom ove dionice, pokazala odgovornost prema lokalnoj zajednici i osigurala bolja povezanost naselja.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeće inicijative:

- 11/8.** Pokrećem inicijativu za iscrtavanje parkinga, iscrtavanje mjesta za invalide kao i čišćenje parkinga u ulici Omladinska odnosno kod marketa Mega diskont preko puta sportske dvorane „Amel Bečković“.

Obrazloženje:

Pomenuti parking je javan i koriste ga stanari okolnih zgrada, posjetioci marketa, posjetioci dvorane i svi drugi građani ali na žalost o istom niko ne vodi brigu, tako da je isti pun smeća. Pored toga parking nije iscrtan pojedinačnim parking mjestima pa se svi nasumično parkiraju i na taj način se gubi preko 30% parking prostora, pored toga invalidna lica koja žive u zgradama kod parkinga nemaju predviđena parking mjesta za invalide što im dodatno otežava život. Nadam se prihvatanju ove inicijative i rješavanju ovog problema građana.

- 11/9.** Pokrećem inicijativu za uspostavu rada u obje smjena doktora porodične medicine u ambulanti Kobilja Glava.

Obrazloženje:

Obzirom da su ispunjeni zakonski uslovi da u skladu sa brojem kartona kao i brojem pacijenata koji svakodnevno koriste ambulantu porodične medicine na Kobiljoj Glavi imamo svakim danom ljekara porodične medicine u obje smjene. Molim nadležnu službu da JU Dom zdravlja Kantona Sarajevo, OJ DZ Vogošća kao i nadležnom ministarstvu uputi ovu inicijativu i zahtjeva da se ona odmah realizuje, kako bi građani Kobilje Glave imali adekvatnu zdravstvenu zaštitu u obje smjene.

Vijećnica **Salčin Sabiha (u ime Kluba vijećnika SDA)** pokrenula je slijedeće inicijative:

- 11/10.** Pokrećem inicijativu prema Inspektoratu Općine Vogošća i KJKP "Vodovod i kanalizacija" Sarajevo za sanaciju oštećenja na saobraćajnicama nastalih nakon izvođenja radova u centralnom dijelu Vogošće.

Obrazloženje:

Na osnovu zahtjeva velikog broja građana općine Vogošća pokrećem inicijativu prema Inspektoratu Općine Vogošća i KJKP "Vodovod i kanalizacija" Sarajevo za sanaciju oštećenja koja su nastala nakon izvođenja radova na vodovodnoj i kanalizacionoj mreži od strane ovog preduzeća u centralnom dijelu Vogošće. Navedena oštećenja, u vidu rupa i neravnina na saobraćajnicama, predstavljaju značajan problem za svakodnevno kretanje stanovnika, ugrožavaju sigurnost učesnika u saobraćaju, te negativno utiču na kvalitet života u lokalnoj zajednici. S tim u vezi, potrebno je izvršiti hitnu procjenu stanja oštećenih saobraćajnica na navedenom području, te preuzeti potrebne mjere za njihovu sanaciju u najkraćem mogućem roku. Također, predlažemo da se u budućnosti, prilikom planiranja i izvođenja radova, osigura bolja koordinacija sa općinskim službama, kako bi se sanacija saobraćajnica izvršila odmah po završetku radova.

- 11/11.** Pokrećem inicijativu prema Ministarstvu za obrazovanje nauku i mlade Kantona Sarajevo za obezbijeđenje alternativnog energenta za grijanje obrazovnih ustanova koji se napajaju toplotnom energijom iz firme Bags Energotehnika d.d. Vogošća.

Obrazloženje:

Uzimajući u obzir sve učestalije probleme u vezi s isporukom energenata od strane firme Bags Energotehnika d.d. Vogošća, te imajući na umu ranije zabilježena kašnjenja u početku grejne sezone, ovim putem upućujem inicijativu za hitno razmatranje mogućnosti obezbijeđenja alternativnih izvora grijanja za obrazovne ustanove koje su u nadležnosti Ministarstva za obrazovanje nauku i mlade Kantona Sarajevo. Prema dostupnim informacijama, ni ove godine ne možemo sa sigurnošću tvrditi da će škole biti zagrijane toplotnom energijom od strane Bags Energotehnika d.d. Vogošća, što direktno ugrožava kontinuitet nastavnog procesa i zdravlje učenika. Cilj ove inicijative je da se spriječi situacija u kojoj bi učenici bili prisiljeni pohađati nastavu u neadekvatnim uslovima, što može imati dugoročne posljedice po njihovo zdravlje i obrazovanje. Nadam se da će Ministarstvo prepoznati važnost ove inicijative i poduzeti odgovarajuće korake u najkraćem mogućem roku.

Vijećnik **Gljiva Avdo (u ime Kluba vijećnika DF)** pokrenuo je slijedeću inicijativu:

- 11/12.** Pokrećem inicijativu da se poduzmu mjere za povećanje vidljivosti i sigurnosti pješačkog prelaza u Donjem Hotonju, koji se nalazi ispod pasarele (trenutno zatvorene za korištenje zbog oštećenja).

Obrazloženje:

Naime, navedeni pješački prelaz je nedavno iscrtan, ali zbog svog položaja na pravcu ceste i bez adekvatnog osvjetljenja nije dovoljno uočljiv vozačima, što stvara rizik za pješake, posebno u jutarnjim i večernjim satima. Predlažem da se u skladu s tehničkim mogućnostima i propisima, poboljša horizontalna i vertikalna signalizacija, te razmotri:

- postavljanje svjetlećeg znaka upozorenja na pješake,
- dodatno osvjetljenje prelaza,
- ili reflektirajuća signalizacija koja bi prelaz učinila vidljivijim noću i pri slaboj vidljivosti.

Iako policija povremeno pomaže pješacima u prelasku u udarnim terminima, potrebno je sistemsko rješenje koje će omogućiti sigurnost svih učesnika u saobraćaju.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 11/13.** Pokrećem inicijativu da se napravi zaustavna traka na dionici puta prema petlji zbog skretanja koje nije bezbjedno prema Jošanici III.

Obrazloženje:

Dionica puta prema Jošanici III je jedna od najprometnijih u našoj općini. Uključenje odnosno skretanje iz pravca grada je izuzetno teško praktično nemoguće i zbog toga se produži vozilom i napravi krug na kružnom toku i vrati da bi se uključio prema pomenutom naselju. Na tom dijelu magistralnog puta nedostaje isprekidana linija, saobraćajni znakovi upozorenja i tzv. zebra. Djeca zbog toga ne idu samostalno u školu, jer ne mogu preći ulicu. Molim nadležne općinske službe i više nivoe vlasti da pokušaju iznaći rješenje za ovaj problem.

- 11/14.** Pokrećem inicijativu da se se očisti, uredi, te postavi rasvjetno tijelo na stepenicama koje vode do stambenih objekata ulice Skendera Kulenovića.

Obrazloženje:

Stepenište koje se nalazi uz magistralni put, iznad autobusnog stajališta u noćnim satima je neosvjetljeno i nije ugodno za korištenje. Također sa jedne strane je zaraslo šibljem i niskim rastinjem koje u toku ljetnih mjeseci pređe preko stepeništa. Ujedno je nažalost i mamac za otpatke i drugo smeće. Uz objekat koji se nalazi u blizini, a koji je u privatnom vlasništvu skupljaju se u posljednje vrijeme i psi litalice, što dodatno usložnjava problematiku. Mislim da sigurnost naših građana, prvenstveno djece nikada ne treba biti zanemareno. Lijevo od stepeništa je uređena zelena površina sa nazivom našeg naselja. Tako da dodatnim uređenjem ovog dijela, ta slika će izgledati potpuno drugačije. Odavaće dojam brige o izgledu našeg grada sa očišćenim i čuvanim zelenim površinama koje su pluća i oaze svakog grada.

Vijećnica **Briga Sanela (u ime Kluba vijećnika SDA)** pokrenula je slijedeću inicijativu:

- 11/15.** Ovom inicijativom ukazujem na potrebu intervencije na asfaltnoj podlozi u ulici Skendera Kulenovića broj 78., na području naselja Rosulje.

Obrazloženje:

Na pomenutoj lokaciji su prisutna značajna oštećenja asfaltne podloge u vidu ulegnuća i ispucanih površina, što predstavlja opasnost za učesnike u saobraćaju, te narušava estetski izgled i funkcionalnost javne saobraćajnice. S obzirom na navedeno, pokrećem inicijativu prema nadležnoj općinskoj službi da se:

- izvrši terenski pregled i procjena stanja predmetne ulice,
- utvrdi tačan uzrok oštećenja, te uvrsti u sanaciju ovog dijela ulice.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 11/16.** Pokrećem inicijativu za postavljanje usporivača brzine u ulici Tome Mendeša od semafora do pekare „Domaćin“.

Obrazloženje:

Obzirom da neodgovorni vozači ovim dijelom ceste voze jako brzo i na taj način ugrožavaju i pješake i druge učesnike u saobraćaju, a pogotovo u vremenu kada je gužva, jer ovaj putni pravac koriste kao alternativni za brže kretanje u jutarnjim i popodnevnm gužvama.

11/17. Pokrećem inicijativu za hitnu sanaciju ulice Orahov Brijeg od broja 42. do broja 90.

Obrazloženje:

Građanke i građani iz ulice Orahov Brijeg skrenuli su nam pažnju na put u ovoj ulici od broja 42. do broja 90, koji je prepun rupa, neravan i u izrazito lošem stanju, što predstavlja rizik za sigurnost i imovinu stanovnika ovog naselja koji put koriste svakodnevno. S obzirom da sanacija ovog puta nije planirana programom prioriteta, a da je većina puteva u okolini uspješno rehabilitovana, sanirana i izgrađena, molimo da se razmotri hitna sanacija navedenog puta ili planiranje realizacije ovog projekta za narednu godinu.

Vijećnik **Gljiva Eno (u ime Kluba vijećnika DF)** pokrenuo je slijedeću inicijativu:

11/18. Pokrećem inicijativu za asfaltiranje veoma kratkog dijela ulice Rosulje tj. od pružnog prelaza, pored pravoslavnog groblja pa do spoja sa ulicom 24. juna.

Obrazloženje:

Mještani dijela ulice Rosulje, naročito stanari novouseljene zgrade na adresi Rosulje do broja 2, već duže vrijeme upozoravaju na loše stanje dijela pomenute ulice. Ulica je bila asfaltirana, ali sada asfalta uglavnom nema ili je ulegnut, te je ulica puna rupa što otežava promet automobilima. Više nije bezbjedno voziti pomenutom ulicom naročito u vrijeme nadolazećih kiša, jer je taj dio ulice pod nagibom te bilo koju privremenu sanaciju pijeskom kiša ispere. Obzirom da je ovo prilazni put za ovu zgradu smatramo da bi ga trebalo sanirati. Smatramo da bi asfaltiranje ovog kratkog dijela pomenute ulice znatno poboljšalo kvalitet života građana kao i estetski izgled naselja, budući da je već od spoja sa ulicom 24. juna urađena široka ulica kroz naselje Nova Vogošća. Ovaj put je predviđen kao prilazni put pomenutoj zgradi.

Vijećnik **Piknjač Admir (u ime Kluba vijećnika NIP)** pokrenuo je slijedeće inicijative:

11/19. Pokrećem inicijativu za izgradnju reciklažnog dvorišta na teritoriji općine Vogošća.

Obrazloženje:

S obzirom na to da se stanovnici općine Vogošća već duži vremenski period suočavaju s problemom nedovoljnog broja posuda (kanti i kontejnera) za odlaganje komunalnog otpada, te da ne postoji adekvatno mjesto za selektivno odlaganje i privremeno skladištenje različitih vrsta otpada, pokrećem inicijativu za izgradnju reciklažnog dvorišta na području naše općine. Podjelom kanti i uklanjanjem kontejnera, onemogućeno je stanovnicima odlaganje manje kabastog otpadnog materijala, a nikada nije bilo omogućeno odlaganje kabastog materijala, građevinskog otpada, elektronskog i električnog otpada, plastike, papira, automobilskih guma i drugih vrsta otpada koji se mogu reciklirati. Zbog nemogućnosti odlaganja navedenog otpada učestalo je nepropisno odlaganje otpada uz kontejnere, formiranje divljih deponija, neodvoženje pomenutog otpada od strane KJKP „Rad“ pod izgovorima nadležnosti, ružna slika lokalne zajednice i na kraju izvori zaraze i opšta zapuštenost i nečistoća. Izgradnjom reciklažnog dvorišta stanovnici bi dobili mjesto za odlaganje otpada, a općina Vogošća bi dobila funkcionalan i ekološki odgovoran sistem upravljanja otpadom, koji bi omogućio selektivno prikupljanje otpada na jednom mjestu. Izbjegla bi se velika količina otpada koja završava na nelegalnim deponijama. Sigurno bi se podigla svijest građana o važnosti reciklaže i adekvatnog odlaganja otpada, itd. Predlažem da nadležna općinska služba izvrši analizu i pronađe adekvatnu lokaciju za izgradnju reciklažnog dvorišta, izradi idejni projekat i okvirni troškovnik izgradnje, te da pokrene procedure apliciranja za sufinansiranje projekta prema Fondu za zaštitu okoliša F BiH, Ministarstvu privrede Kantona Sarajevo, KJKP „Rad“ i svim drugim nadležnim institucijama koje bi na adekvatan način pomogle i učestvovala u izgradnji reciklažnog dvorišta koje je itekako potrebno našim stanovnicima i općini Vogošća. Napominjem da susjedna općina Ilijaš ima izgrađeno reciklažno dvorište i da su rezultati odlaganja otpada stanovnika veliki benefit za ovu lokalnu zajednicu.

11/20. Pokrećem inicijativu za hitno i sistemsko rješavanje problema velikog broja pasa litalica na području općine Vogošća.

Obrazloženje:

U posljednje vrijeme u cijeloj Bosni i Hercegovini raste broj pasa litalica, napada i ugriza pasa koje oni čine građanima. Raspolažem sa podacima koji su alarmantni za područje Kantona Sarajevo da je u razdoblju od 8 mjeseci zabilježeno oko 600 ujeda pasa litalica. Takođe navodim da u našoj općini u čoporima psi litalice slobodno lutaju ulicama, a konkretno ogroman broj se nalazi u staroj Industrijskoj zoni u krugu nekadašnjeg „Pretisa“. Psi litalice su posljedica kombinacije ljudske neodgovornosti i prirodnog razmnožavanja

pasa bez kontrole. Dakle, bez kontrole (sterilizacija, čipiranja, edukacije, azila, itd.) populacija pasa lutilica se brzo širi, te dolazi do opasnosti i ugrožavanja sigurnosti i zdravlja stanovnika, a naročito djece. Mnogo kolegica i kolega je iznijelo istu inicijativu i isti problem i čuli smo odgovore od nadležne službe, a oni glase: „Tačno je da je povećan broj pasa lutilica“. „Dovozi nam NEKO iz drugih općina i područja pse lutilice i puštaju ih na teritoriji naše općine“. „Nije naša nadležnost uklanjanje pasa lutilica“. „Postoje razne procedure na koji se način uklanjaju psi lutilice, itd.“ To nije i ne smije biti odgovor i ne može se tako rješavati problem povećanog broja pasa lutilica na području naše općine. Koliko sam mogao pronaći informacije nadležnost pasa lutilica u Bosni i Hercegovini je regulisana Zakonom o zaštiti životinja i pravilnicima lokalne zajednice, te veterinarske službe. Dakle primarna odgovornost opet ukazuje da je Općina, odnosno nadležna općinska služba i veterinarska stanica prva odgovorna za uklanjanje pasa lutilica sa ulica i područja općine Vogošća. Za mene, kao i za sve nas građane Vogošće je ovo alarmantan problem koji se treba hitno riješiti bez odlaganja. Svjedoci smo događaja u Goraždu i napada psa lutilice na osmogodišnje dijete koje je prošlo sa teškim povredama, a da ne spominjem traume koje će ostati kao posljedica napada, čitav život. Iz medija i sa društvenih mreža saznajem da se i u Goraždu raspravlja ko je nadležan za uklanjanje pasa lutilica, a dijete je jedva oteto i spašeno od napada psa lutilice. Kasno je kada nam se desi da bilo ko nastrada na ovakav način bez obzira na nadležnost i odgovornost. Zato vas sve molim i zahtijevam od nadležne općinske službe da po hitnom postupku sa veterinarskim službama i NVO koje se bave zaštitom životinja prvo organizuju hvatanje pasa lutilica, osiguraju privremeni smještaj ili azil, izvrše sterilizaciju i sve neophodne radnje na uklanjanju pasa lutilica, a istovremeno i hitno da općinska nadležna služba uputi inicijativu višim nivoima vlasti za izmjenu Zakona o zaštiti životinja, konkretno pasa lutilica, da se jasno i precizno zna ko je nadležan i odgovoran za psa lutilicu kada se nađe na ulicama gradova i općina kako ne bi činili nepravdu i nepravilnosti niti prema životinjama, a pogotovo čovjeku ili djetetu za kojeg su šteta, sigurnost, trauma i strah neprocjenljivi.

Vijećnik Omerović Denis (u ime Kluba vijećnika SDP) pokrenuo je slijedeće inicijative:

- 11/21.** Pokrećem inicijativu prema nadležnim službama za postavljanje sigurnosnih kamera na ulazu u naselje Svrake.

Obrazloženje:

Predlažem postavljanje sigurnosnih kamera na ulazu u naselje Svrake, na lokaciji kod mosta koji vodi u naselje, odnosno na mjestu gdje se put račva prema novoj i staroj željezničkoj stanici. Na toj lokaciji već postoji bandera sa priključkom električne energije, što znači da bi s tehničke strane postavljanje kamera bilo jednostavno i bez dodatnih infrastrukturnih radova. Ugradnjom sigurnosnih kamera na ovom mjestu značajno bi se povećala bezbjednost stanovnika naselja, kao i zaštita imovine te prevencija vandalizma i nelegalnih aktivnosti. Lokacija je posebno važna, jer predstavlja glavni ulaz u naselje i mjesto kroz koje svakodnevno prolazi veliki broj vozila i pješaka.

- 11/22.** Pokrećem inicijativu za obilježavanje i osiguranje parking mjesta za osobe sa invaliditetom u ulici Skendera Kulenovića, kod broja 24.

Obrazloženje:

Na ovom dijelu ulice trenutno ne postoji posebno označeno parking mjesto namijenjeno osobama sa invaliditetom, iako se radi o lokaciji gdje je potrebna dodatna pristupačnost i sigurnost prilikom parkiranja i kretanja. Uspostavljanjem parking mjesta sa odgovarajućom horizontalnom i vertikalnom signalizacijom unaprijediti bi se pristupačnost ove ulice i osiguralo da osobe sa invaliditetom imaju olakšan pristup objektima i stambenim zgradama u neposrednoj blizini. Molim nadležnu službu da razmotri ovu inicijativu i da u skladu s tehničkim mogućnostima planira i realizuje obilježavanje parking mjesta za osobe sa invaliditetom na navedenoj lokaciji.

Vijećnica Šabić Dalia (u ime Kluba vijećnika DF) pokrenula je slijedeće inicijative:

- 11/23.** Pokrećem inicijativu u ime građana ulice Omladinska br. 5., 7., 9. i 11., kojom se traži uređenje i obilježavanje parking prostora ispred navedenih stambenih zgrada.

Obrazloženje:

Građani ovog područja već duže vrijeme suočavaju se sa problemom neuređenog i neobilježenog parking prostora, što dovodi do svakodnevnih nesporazuma među vozačima, nepropisnog parkiranja i otežanog pristupa ulazima u zgrade, kao i prolaza za

vozila hitnih službi. S tim u vezi, predlažemo da nadležna općinska služba, u suradnji sa nadležnim javnim preduzećem, izvrši obilježavanje (iscrtavanje) parking mjesta ispred zgrada u ulici Omladinska broj 5., 7., 9. i 11., u skladu sa važećim tehničkim standardima i prostornim mogućnostima, te da se postavi odgovarajuća saobraćajna signalizacija, kako bi se povećala sigurnost i funkcionalnost prostora. Ovim uređenjem doprinijelo bi se povećanju bezbjednosti, uređenju javne površine i boljoj organizaciji svakodnevnog života stanara.

- 11/24.** Pokrećem inicijativu da se postavi adekvatna javna rasvjeta oko spomen-obilježja u naselju Donji Hotonj, u neposrednoj blizini Osnovne škole „Izet Šabić“.

Obrazloženje:

Naime, prostor oko spomenika trenutno nije osvijetljen, te u večernjim satima postaje mjesto okupljanja u mraku, što stvara osjećaj nesigurnosti među mještanima i roditeljima djece koja pohađaju obližnju školu. Osim aspekta sigurnosti, spomen-obilježje kao mjesto sjećanja i poštovanja zaslužuje da bude primjereno uređeno i osvijetljeno, naročito imajući u vidu njegov značaj za lokalnu zajednicu. Predlažem da nadležna služba Općine Vogošća izvrši pregled lokacije i pokrene aktivnosti na postavljanju rasvjetnih tijela oko spomenika.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

- 11/25.** Pokrećem inicijativu da se u narednoj godini organizuje i podrži Agro/Rural izložba i prodaja poljoprivrednih i prehrambenih proizvoda vogošćanskih poljoprivrednika koja bi mogla postati i tradicionalna. Višednevna manifestacija može biti upriličena u sklopu Vogošćanskih dana ili u nekom drugom terminu (jesenskom) kada poljoprivrednici imaju znatno veće količine proizvoda odnosno širi asortiman proizvoda skupljenih i pripremljenih na njihovim gazdinstvima. Također, neophodno je obezbijediti štandove za izlaganje i omogućiti zainteresiranim poljoprivrednicima besplatno učešće odnosno izlaganje. Sajam bi predstavljao priliku da proizvođači na najbolji mogući način predstave svoje proizvode sugrađanima, što u konačnici predstavlja i podršku malim poljoprivrednim gazdinstvima.

Vijećnica **Curić Samira (u ime Kluba vijećnika SDP)** pokrenula je slijedeću inicijativu:

- 11/26.** Pokrećem inicijativu za rješavanje problema nepropisnog parkiranja i saobraćajnog zagušenja u ulici Braće Halać (zanatski centar preko puta Općine Vogošća). Stanari u ulici Braće Halać u neposrednoj blizini zanatskog centra preko puta zgrade Općine Vogošća, već duži niz godina suočavaju se sa ozbiljnim problemom nepropisnog parkiranja i onemogućenim pristupom ulici. Naime, na ulazu u navedenu ulicu jasno je postavljen saobraćajni znak zabrane saobraćaja za sva motorna vozila, osim za stanare i vozila za snabdijevanje. Međutim, uprkos postavljenoj signalizaciji, svakodnevno dolazi do ulaska i parkiranja vozila koja nisu izuzeta tom zabranom, čime se ulica blokira i onemogućava nesmetan prolaz i parkiranje stanarima. Dodatni problem predstavlja i višesatno parkiranje vozila koja nemaju pravo pristupa, te "zagrađivanje" onih koji imaju uredno obezbijeđen prilaz svojim stambenim ili poslovnim objektima. Kako bi se ovaj dugogodišnji problem konačno riješio, pokrećem inicijativu da Policijska uprava Vogošća:

1. pojača redovne kontrole i obilazak ulice Braće Halać, posebno u periodima kada je najizraženije nepropisno parkiranje,
2. reaguje u skladu sa zakonom prema licima koja ne poštuju postavljenu saobraćajnu signalizaciju.

Uvjerena sam da bi redovnijim prisustvom policije i primjenom zakonskih mjera bio smanjen broj prekršaja, čime bi se stanarima osigurao normalan pristup svojim objektima, a ulica Braće Halać konačno uredila u skladu sa saobraćajnim propisima.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

- 11/27.** Pokrećem inicijativu prema nadležnim da se uvede usluga uzimanja i transporta mikrobioloških uzoraka (urinokultura, brisevi) u Dom zdravlja Vogošća.

Obrazloženje:

Prema trenutnoj organizaciji zdravstvene zaštite, mikrobiološke analize poput urinokulture i briseva obavljaju se samo u pojedinim općinama Kantona Sarajevo. Stanovnici naše općine su stoga prinuđeni da putuju u druge općine, snose dodatne troškove prijevoza, često posežu za privatnim laboratorijama, gdje su ove analize skupe, gube dragocjeno vrijeme, što naročito teško pada starijim osobama, hroničnim bolesnicima, trudnicama i djeci. Smisao primarne zdravstvene zaštite je da pacijent što bliže mjestu stanovanja može dobiti

osnovne i neophodne dijagnostičke usluge. Urinokultura i brisevi spadaju upravo u tu grupu pretraga. Predlažem da se u Domu zdravlja Vogošća uvede:

- Uzimanje uzoraka (urina i briseva) od pacijenata.
- Organizovan i redovan transport uzoraka u postojeće mikrobiološke laboratorije u Kantonu Sarajevo.

Ovakav korak ne zahtijeva otvaranje nove laboratorije u našoj općini, ali značajno poboljšava dostupnost zdravstvenih usluga, smanjuje nepotrebne troškove i povećava kvalitet zdravstvene zaštite. Uvjereni smo da će nadležni organi prepoznati važnost ove inicijative i uvrstiti je u plan rada Doma zdravlja Vogošća i Ministarstva zdravstva Kantona Sarajevo.

- 11/28.** Pokrećem inicijativu da se u okviru 5K utrke prošire aktivnosti i da bude cjelodnevni događaj sa radionicama za djecu, šetnjom za starije građanke i građane i sl. U tom smislu da se proširi sadržaj i da ta subota u septembru bude dan za sport i sve generacije.

Obrazloženje:

Utrka 5 K je već tradicionalni projekat u organizaciji JU „Kulturno-sportski centar“ Vogošća u saradnji sa Općinom Vogošća. Dosadašnje iskustvo je pokazatelj da je iz godinu u godinu sve atraktivnije i zanimljivije za sve uzrasne kategorije. Da bi bilo još zanimljivije predlažem da se u taj projekat uvrsti i dodatni sadržaj za ostalu populaciju i naše najstarije sugrađane, tipa radionica za djecu, šetnja za naše najstarije sugrađane, društveno-zabavne igre itd. Mislim da bi to bio izuzetan projekat u kojem bi zaista svi uživali.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 11/29.** Pokrećem inicijativu za pravljenje Budžeta za građane.

Obrazloženje:

Godišnji Budžet Općine predstavlja jedan od najvažnijih dokumenata lokalne samouprave, ali je istovremeno i izuzetno kompleksan i teško razumljiv velikom dijelu javnosti. Upravo zbog toga, smatram da je važno da Općina pomogne građanima da bolje razumiju budžet i način njegovog kreiranja i trošenja. Nije dovoljno da budžet bude samo javno dostupan podjednako je važno da bude i pristupačan i razumljiv građanima. U tom smislu, „Budžet za građane“ predstavlja dobru praksu i alat kojim se transparentno i jednostavno prikazuje kako se planiraju i troše javna sredstva. Radi se o pojednostavljenom dokumentu koji na razumljiv i vizualno pristupačan način prikazuje osnovne budžetske informacije, glavne izvore prihoda i najvažnije rashode, te planirane projekte i investicije. Brojne općine u Bosni i Hercegovini, kao i viši nivoi vlasti, već izrađuju svoje „Budžete za građane“ i time doprinose većoj transparentnosti, povjerenju i participaciji javnosti u procesu donošenja odluka. Prema dostupnim informacijama, Općina Vogošća je među 53% općina u Federaciji BiH koje još uvijek nemaju izrađen „Budžet za građane“. Na 1. redovnoj sjednici u ovom mandatu već sam uputio vijećničku inicijativu za izradu ovog dokumenta, a odgovor nadležne službe bio je da je inicijativa prihvatljiva u skladu s članom 168. Poslovnika Općinskog vijeća Vogošća i da će se u narednom periodu raditi na njenoj realizaciji. Na 6. redovnoj sjednici, nakon usvajanja Izmjena i dopuna Budžeta za 2025 godinu, ponovo sam postavio pitanje o statusu realizacije inicijative, te je odgovor bio da će se ona realizovati prilikom izrade Nacrta budžeta za 2026. godinu. S obzirom na to da se danas razmatra i usvaja Nacrt Budžeta za 2026. godinu, ovom inicijativom podsjećam na ranije dato obećanje i ponovo upućujem zahtjev da Općina Vogošća pristupi izradi „Budžeta za građane“, kako bi se ovaj dokument učinio jednostavnijim, preglednijim i pristupačnijim građanima, te kako bi i naša Općina bila dio pozitivne prakse transparentnog i otvorenog upravljanja javnim finansijama.

- 11/30.** Pokrećem inicijativu za izradu Odluke o viziji razvoja mjesnih zajednica Općine Vogošća, odnosno Operativnog plana za period 2026. –2029. godina.

Obrazloženje:

Polazeći od činjenice da je lokalna samouprava jedan od temelja ustavnog uređenja Bosne i Hercegovine, a da je mjesna zajednica najznačajniji oblik neposrednog učešća građana i građanki u donošenju odluka na lokalnom nivou, smatram da je potrebno sistematski pristupiti unapređenju rada i razvoja mjesnih zajednica na području općine Vogošća. Mjesne zajednice predstavljaju osnovni oblik organizovanja građana kroz koji se ostvaruje njihovo pravo da neposredno učestvuju u javnim poslovima od značaja za svakodnevni život, razvoj infrastrukture i unapređenje kvaliteta života u lokalnim zajednicama. Obaveza i potreba za izradom nove vizije i Operativnog plana najbolje su potvrđene na prethodnim izborima za savjete mjesnih zajednica, gdje je zabilježen nizak nivo učešća građana i građanki, te se iz izbornog ciklusa u ciklus primjećuje pad interesa za rad mjesnih zajednica. Ovakav trend

jasno ukazuje na potrebu da se sistemski pristupi jačanju mjesne samouprave, njenoj vidljivosti i ulozi u svakodnevnom životu građana. Svjesni potrebe da se učešće građana i građanki u procesima odlučivanja na lokalnom nivou ojača i unaprijedi, te da se saradnja između mjesnih zajednica i organa jedinice lokalne samouprave dodatno institucionalizira, neophodno je definisati jasnu viziju razvoja mjesnih zajednica i konkretne ciljeve kroz Operativni plan za period 2026–2029. godine. Podsjećam da je prethodni Operativni plan istekao u junu tekuće godine, te da je potrebno pristupiti izradi novog dokumenta koji će biti usklađen sa savremenim principima participativne demokratije i lokalnog razvoja. U skladu sa Zakonom o principima lokalne samouprave u Federaciji Bosne i Hercegovine i Statutom Općine Vogošća, jedinice lokalne samouprave su dužne da u okviru svojih nadležnosti uspostavljaju organizaciju i stvaraju uslove za ostvarivanje mjesne samouprave. Donošenje ovakvog dokumenta doprinijelo bi jačanju kapaciteta mjesnih zajednica, većoj uključenosti građana u procese odlučivanja, te transparentnijem i efikasnijem radu organa lokalne samouprave.

Vijećnik **Gljiva Bego (u ime Kluba vijećnika S BiH)** pokrenuo je slijedeću inicijativu:

- 11/31.** Pokrećem inicijativu za obilježavanje jednog parking mjesta namijenjenog za osobe sa invaliditetom ispred stambene zgrade na adresi Skendera Kulenovića broj 14.

Obrazloženje:

Na navedenoj adresi trenutno ne postoji obilježeno parking mjesto za osobe sa invaliditetom, te ovu inicijativu pokrećem u ime našeg sugrađana Kemala Zulića koji se obratio zahtjevom za uređenje i obilježavanje parking mjesta za osobe sa invaliditetom. Podnosilac Kemal Zulić je korisnik statusa osobe sa 90% invaliditetom, te posjeduje Rješenje nadležne komisije i znak pristupačnosti izdat od strane MUP-a. Nedostatak prilagođenog parking prostora za osobe sa invaliditetom znatno otežava svakodnevno kretanje i normalno funkcionisanje osoba sa invaliditetom. Ova inicijativa je u skladu sa važećim propisima koji garantuju pravo na pristupačnost i jednakost osoba sa invaliditetom. U ime podnosioca zahtjeva molim nadležnu službu da izvrši procjenu mogućnosti obilježavanja parking mjesta u skladu sa zahtjevom našeg sugrađanina. U prilogu ove inicijative dostavljam:

- Zahtjev za obilježavanje parking mjesta za invalide u ulici Skendera Kulenovića 14,
- Rješenje o invalidnosti i
- Kopiju znaka pristupačnosti za osobe sa invaliditetom.

Vijećnik **Hadžić Nihad (u ime Kluba vijećnika SDA)** pokrenuo je slijedeću inicijativu:

- 11/32.** U ime stanovnika MZ Blagovac pokrećem inicijativu prema Ministarstvu saobraćaja Kantona Sarajevo i KJKP Gras d.o.o Sarajevo da HITNO obezbijedi ispravan i funkcionalan minibus kojim će se obavljati redovna minibuska linija Vogošća-Tihovići.

Obrazloženje:

Obzirom na dugogodišnje probleme sa neredovnim saobraćanjem na minibuskoj liniji Vogošća-Tihovići krajnje je vrijeme da nadležno Ministarstvo i preduzeće osiguraju redovan prijevoz na ovoj liniji. Obraćamo se na sve moguće načine u zadnjih par godina, a situacija je svakim danom sve teža i teža. Molimo, tražimo, zahtjevamo redovnu minibusku liniju Vogošća-Tihovići.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir